

## Headlines

1. प्रधानमंत्री नरेंद्र मोदी होरें आखेआ ऐ जे दिल्ली च होए दे कार धमाके लेई जिम्मेवार कुसै गी बी बख्शेया नेई जाह्ग ते कसूरवारें खलाफ सख्त कनूनी कार्रवाई कीती जाह्ग।
2. दिल्ली धमाके दे बाद कटड़ा, उधमपुर ते डोडा च बी सुरक्षा बवस्था निगगर करी दिती गेदी ऐ।
3. जनजातीय मामलें दे मंत्री जावेद राणा होरें जम्मू युनिवर्सिटी च 2 रोजा जम्मू भाशा सम्मेलन “जम्मूइयत और जबान ओ अदब” दा उद्घाटन कीता।
4. नगरोटा विधानसभा उपचुनांऽ च 72.75 प्रतिशत मतदान दर्ज, बडगाम च 48.53 प्रतिशत मतदाताएं वोट पाए।
5. रंजी ट्रॉफी च जम्मू-कश्मीर नै 65 बरें च पैहली बारी दिल्ली गी हराइयै इतिहास रची दिता ऐ।

<><><><><><>

## PM-Delhi Blast

प्रधानमंत्री नरेंद्र मोदी होरें आखेआ ऐ जे नमी दिल्ली च कल होए दे धमाकें दी साजश रचने आहलें गी बख्शेया नेई जाह्ग ते एह्दे पिच्छे जिस कुसै दा बी हत्थ होआ ओह्दे खलाफ कनूनी कार्रवाई कीती जाह्ग। अज्ज भूटान दी राजधानी थिम्पू च इक समारोह गी संबोधित करदे होई प्रधानमंत्री होरें आखेआ जे कल राती नमी दिल्ली च लाल किले कश होए दे धमाके दी जांच करा’रदिएं एजेंसिएं कन्नै ओहू संपर्क च न ते तहकीकात बारै पूरी जानकारी हासल करा करदे ना। मोदी होरें आखेआ जे जांच एजेंसियां इस घटना दी तैह तगर जाडन ते एह्दे पिच्छे दी साजश दा पता लाइयै रौहडन। भूटान दे दऊं दिनें दे दौरे पर गेदे प्रधानमंत्री होरें आखेआ जे तैहशुदा कार्यक्रम मुजब भूटान दे दौरे पर आए जरूर न पर उंदा दिल कल्लै दी घटना कारण मता दुखी ऐ।

<><><><><><>

## Shah-Meeting Blast

केंद्री गृह मंत्री अमित शाह होरें अज्ज नमीं दिल्ली च अपने सरकारी आवास पर इक उच्चि सतह दी सुरक्षा समीक्षा बैठक दी अध्यक्षता कीती। एहू बैठक कल राती नमी दिल्ली च लाल किले कश होए दे कार धमाके दे बाद दी सुरक्षा स्थिति दा जायजा लैने लेई सद्दी गेदी ही। बैठका च केंद्री गृह सचिव, खूफिया ब्यूरो दे निदेशक, दिल्ली दे पुलस कमिशनर ते राश्ट्री जांच एजेंसी दे महानिदेशक बी मजूद हे। इन्दे अलावा जम्मू-कश्मीर दे पुलस महानिदेशक नलिन प्रभात होरें बी वर्चुअल ढंगे नै इस बैठक च शिरकत कीती। कल्लै आहली घटना दे बाद सभनें संवेदनशील इलाकें च सुरक्षा बंदोबस्त निगगर करी दित्ते गे न। सुरक्षा एजेंसियां ते प्रशासन सुरक्षा हालात पर नेडमी तक्क रक्खा करदे न। तोआई जम्मू-कश्मीर च बी उपराज्यपाल मनोज सिन्हा हुंदी अध्यक्षता च इक उच्चि सतह दी बैठका च सुरक्षा हालात दा जायजा लैता गेआ। श्रीनगर च लग्गी दी इस बैठका च पुलस महानिदेशक नलिन प्रभात हुंदे अलावा होर कई बड्डे अधिकारी बी शामिल होए।

<><><><><><>

## Security-Katra

दिल्ली च कल राती होए दे कार धमाके दे बाद जित्थे पूरे मुल्खै च संवेदनशील इलाकें च सुरक्षा बधाई दित्ती गेदी ऐ, उत्थे गै रियासी जिला प्रशासन नै श्री माता वैष्णो देवी यात्रा दे आधार शिविर कटड़ा च बी निगरानी ते सुरक्षा बंदोबस्त पुख्ता करी दित्ते न। एहूदे कन्नोकन्नी आले-दोआले दे क्षेत्रें, जित्थे सैलानिएं ते श्रद्धालुएं दी आओजाई लग्गी दी रौहंदी ऐ, उत्थे बी सुरक्षा ते सर्तकता बधाई दित्ती गई ऐ ते हर नकलोहरकत पर नेडमी तक्क रक्खी जा'रदी ऐ। आकाशवाणी दे जम्मू संवाददाता नै जानकारी दितती ऐ जे समूलचे जम्मू प्रांतै च हाई अलर्ट जारी ऐ ते यात्रिएं ते आम नागरिकें दी सुरक्षा लेई सुरक्षा एजेंसिएं गी हाई अलर्ट पर रक्खेआ गेआ ऐ। महत्वपूर्ण थाहरें पर नाके लाइयै औने-जाने आहलें ते गड्डिएं दी तपाशी लैती जा'रदी ऐ। माता दे भवन, कटड़ा रेलवे स्टेशन, बस अड्डे ते होरनें थाहरें जित्थे लोकें दी आओजाई मती रौहंदी ऐ उत्थै सुरक्षा बधाई दित्ती गेदी ऐ।

<><><><><><>

## Security-Udh.

उधमपुर ते डोडा जिले च बी सुरक्षा बवस्था निगरी करी दित्ती गेदी ऐ। जरनैली शिड़क ते शैहरै दे अंदरले इलाकें च बाददू तैनाती करियै भीड़भाड़ आहले इलाकें च निगरानी रक्खी जा'रदी ऐ। संवेदनशील इलाकें च विशेष जांच नाके लाइयै औने-जाने आहलें कोला पुच्छ-गिच्छ ते जांच कीती जा'रदी ऐ। जिला प्रशासन नै सभनें सुरक्षा इकाइयें गी लोकें दी सुरक्षा यकीनी बनाने लेई मता सौहगा-सतर्क रेहियै कम्म करने लेई आखेआ ऐ। तोआई, डोडा जिले च बी कल्लै दे दिल्ली कार धमाके दे बाद एहतियात दे तौरा पर सुरखा बधाई दित्ती गेदी ऐ। सार्वजनिक थाहरें ते सैलानी थाहरें पर मती सतर्कता बरती जा'रदी ऐ। कनून बवस्था बनाई रखने लेई पुलसै दी गश्त बी बधाई दित्ती गेदी ऐ।

<><><><><><>

## Rana-Jammu Language

जनजातीय मामलें दे मंत्री जावेद राणा होरें अज्ज जम्मू यूनिवर्सिटी च 2 रोजा जम्मू भाशा सम्मेलन जम्मूइयत औरै जबान ओ अदब दा उद्घाटन कीता। इस मौके किट्टै गी संबोधित करदे होई राणा होरें विद्वानें, भाशा प्रेमिएं गी इस आयोजन लेई किट्टे करने पर युनिवर्सिटी दे उर्दू विभाग दी सराहना कीती। उनें आखेआ कि उर्दू भाशा बक्ख-बक्ख खित्तें बश्कार इक-दुए गी जोड़ने आहले पुल दा कम्म करदी ऐ ते बक्ख-बक्ख कलाएं, संस्कृतिएं ते परम्पराएं गी इक दुए दे कोल आहनने दा कम्म करदी ऐ। उनें आखेआ जे जम्मू दे कवि ते लखारी इस धरती दी संस्कृति, सभ्यता, सजीवता ते मूल आत्मा गी अपनी रचनाएं राएं उजागर करदे न। उनें जम्मू यूनिवर्सिटी च सभनें क्षेत्री भाशाएं लेई इक अनुसंधान केंद्र खडेरने दा समर्थन बी कीता।

<><><><><><>

## By Polls Voting

नगरोटा ते बड़गाम हल्के च मतदान होआ'रदा ऐ ते आधिकारिक आंकड़ें मुजब दपैहरी दे 5 बजे तोड़ी खरी मती गिनतरी च लोकें मतदान कीता। नगरोटा असेंबली हल्के च 5 बजे तोड़ी 72.75 फीसदी लोकें मतदान कीता ते बड़गाम असेंबली हल्के च दपैहरी दे 5 बजे तोड़ी 48.53 प्रतिशत लोकें मतदान कीता। अधिकारियें मताबक इस आंकड़ें च होर बाद्दा होने दी मेद कीती जा'रदी ऐ।

<><><><><><>

## Prog. Announcement

आकाशवाणी दा क्षेत्रीय समाचार एकांश 'विश्व मधुमय दिवस' दे मौके पर औंदी 14 नवम्बर गी 30एं मिटनें दी इक विशेष चर्चा प्रसारित करने जा'रदा ऐ जेहदा विषे ऐ डायबीटीज, इट्ज़ काजिज, सिम्पटम्ज़ एण्ड प्रिवेंशन यानि मधुमय एहदे कारण, लक्षण ते एहतियाती उपाऽ। शुकरवारें दिनें ढाई बजे प्रसारित होने आहले इक विशेष कार्यक्रम च स्हाड़े मेहमान होडन जम्मू मेडिकल कॉलेज च एंडोक्रिनोलोजी विभाग दे अध्यक्ष डॉ. सुमन कोतवाल जेहड़े शुगर रोग बारै जानकारी श्रोताएं कन्नै सांझी करडन। इन्दे कन्नै गल्लबात करडन स्हाड़े न्यूज एंकर विजय बजाज। एहू कार्यक्रम स्हाड़े इस्सै चैनल पर मीडियम वेव 303 मीटर यानि 990 किलोहर्टज ते एफ.एम 100 इशारिया 3 मैगाहर्टज पर सुनी सकदे ओ।

<><><><><><>

## J&K Ranji

जम्मू-कश्मीर दी इक क्रिकेट टीम नै बल्लेबाज कामरान इकबाल दे शानदार शतक दी बदौलत दिल्ली गी 7 विकेटें कन्नै हराया। एहू जम्मू-कश्मीर दी रांजी ट्रॉफी क्रिकेट च दिल्ली ज्नेई जबरदस्त बरोधी टीम खलाफ पैहली जित्त ऐ। 179 रन्जें दा पिच्छा करदे होई जम्मू-कश्मीर गी खीरी ध्याड़े जित्तने आस्तै 124 रन्ज लोड़चदे हे। ओपनर इकबाल हुंदी 147 गेंदें च 133 रन्जें दी पारी नै जम्मू-कश्मीर गी जित्त दोआई। 1960 दे मगरा हुनै तोड़ी दिल्ली ते जम्मू-कश्मीर बश्कार 43 बारी मकाबला होई चुके दा ऐ जिंदे च 37 मुकाबले दिल्ली दी जित्त उप्पर खत्म होए। जम्मू-कश्मीर दे आकिब नबी गी शानदार प्रदर्शन आस्ते 'मैन ऑफ द मैच' घोषित कीता गेआ।

## Education Ramban

रामबन जिले च शिक्षा विभाग नै हाल च वर्कशापें दी श्रृंखला दा आयोजन कीता गेआ जेदे च शिक्षकें दी ट्रेनिंग, डिजिटल उपकरणें दा इस्तेमाल, समावेशी शिक्षा, उच्च शिक्षा समेत होरनें चीजें उपपर ध्यान केंद्रित कीता गेआ। अधिकारियें विद्यार्थियें दी सिखलाई च उन्दे चरित्र ते मूल्लें दी भूमिका उपपर जोर भरेआ ते जिला शिक्षा ते सिखलाई संस्थानें डाइट गी होर मजबूत करने आस्तै आखेआ। इनें वर्कशापें दी श्रृंखला च विद्यार्थियें राएं कौशल सरबन्धित कार्यक्रम जियां के पेंटिंग, मिट्टी दे भांडे बनाने, टोकरी बुनने समेत होर गतिविधियां बी करोआइयां गेइयां। इस पैहलकदमी दा मकसद बच्चें गी समग्र शिक्षा, रचनात्मक तमे व्यवसायिक शिक्षा प्रदान करना हा, जेदे लेई शिक्षा विभाग पूरी चाहली बचनबद्ध ऐ।

<><><><><><>